


Ni Presidente Henry B. Eyring

Umuna a Mammagbaga iti Umuna a Panguluén



Panagbalin a Pudno a Disipulo

Iti tunggal miting ti sakramento, adda pribilehiotayo a mangikari iti Nailangitan nga Ama a kanayonto a laglagipentayo ti Mangisalakan ken agtungpal kadagiti katulaganna tapno adda kadatayo ti Espirituna a mangkaddua kadatayo (kitaen iti Moroni 4:3; 5:2; DkK 20:77, 79). Gagangay a manglaglagiptayo Kenkuana no awatentayo ti naganna kadatayo. Aramidentayo daytoy iti adu a wagas nangnangruna no agserbitayo iti dadduma iti naganna, basaentayo dagiti nasantuan a balikasna, ken agkararagta-yo tapno ammuen no ania ti iparamidna kadatayo.

Napasamak daytoy kaniak idi inaramidko ti panagbuniang ti maysa nga agtutubo a lalaki. Ammok nga inawangannak dagiti naordenan a katulongan ti Mangisalakan kas maysa a misionario a mangisuro iti ebanghelio ken mangipanekek Kenkuana ken ti pudno a Simbaanna. Inkarimi iti kaduak a misionario iti agtutubo a lalaki nga isu ket madalusanto babaen ti bileg ti Pannubbot ni Jesucristo no agbabawi isuna nga addaan pammati iti Mangisalakan ken agpabuniang iti maysa kadagiti napusgan a katulonganna.

Idi inlung-awko ti agtutubo a lalaki iti danum ti puente a pagbuniangan, inyarasaasna kaniak, “Nadalusakon, nadalusakon.” Iti dayta a kanito, nalagipko idi binuniangan ni Juan Bautista Mangisalakan iti Karayan Jordan. Maysa pay, nalagipko nga ar-aramidek ti pangisalakan nga aramid ti nagungar ken sibibiag a Mangisalakan—nga inmatangan ti Espiritu Santo, kas iti inaramid idi ni Juan.

Para kaniak ken para iti tunggal maysa kadatayo, ti panaglaglagip iti Mangisalakan ket ad-adda pay ngem iti

panangpannuray iti lagip ti pannakaammo ken padastayo Kenkuana. Makaaramidntayo kadagiti pili iti inaldaw a mangyasiddeg kadatayo nga ad-adda Kenkuana iti agdama.

Mabalina a panagbasa kadagiti nasantuan a kasuratan ti kasimplean a pili. Babaen ti panangaramid iti kastoy, mariknatayo nga asidegtayo Kenkuana. Para kaniak, mariknak unay ti kinaasideg no agbasaak iti Libro ni Mormon. Kadagiti umuna a minuto nga agbasaak kadagiti kapitulo ti 2 Nephi, mangngegko iti panunotko dagiit timek da Nephi ken Lehi a mangiladladawan iti Mangisalakan a kasla personal nga ammoda Isuna. Sumangbay ti rikna ti kinaasideg.

Para kadakayo, adda dagiti dadduma a lugar iti nasantuan a kasuratan ti mangyasiddeg kadakayo Kenkuana. Ngem sadino man ken kaanuman no basaenyo ti balikas ti Dios, nga addaan napakumbaba ken pudno a panggep a manglaglagip iti Mangisalakan, mapadakkelyonto ti tarigagayyo nga umawat iti naganna kadakayo iti inaldaw a panagbiagyo.

Dayta a tarigagay ti mangbalbaliwto iti wagas a panagserbiyo iti Simbaan ti Apo. Agkararagkayonto iti Nailangitan nga Ama para iti tulong a mangikarigatan nga aramiden iti awagyo uray no ipagarupyo a bassit daytoy. Ti tulong a dawatenyonto ket ti kabaelan a manglipat iti bagiyo ket mangipokus nga ad-adda pay no ania ti kayat ti Mangisalakan para kadagiti tao a nakaawaganyo a pagserbian.

Nariknak ti imana ken ti kinaasidegna iti panagserbik kadagiti annakko idi nagkararagak tapno ammuen no kasano a matulongak ida a makasarak iti talna a ti laeng ebanghelio ti mangisangbay. Kadagiti kasta a kanito,

awan pategna kaniak no makitaak a maysa a naballigian a nagannak, ngem napateg unay kaniak ti balligi ken pagimbagan dagiti annakko.

Ti tarigagay a ited kadagiti pagserbiantayo nga ited ti Mangisalakan kadakuada ket mangiturong kadagiti kararag a *mayar-araraw* iti Nailangitan nga Ama, a sipupudno iti nagan ni Jesucristo. No agkararagtayo iti kasta a wagas—iti nagan ti Mangisalakan, nga addaan pammati Kenkuana—sumungbat ti Ama. Ibaonna ti Espiritu Santo a mangtarabay, mangliwliwa, ken mangparegta kadatayo. Gapu ta kanayon nga agpaneknek ti Espiritu maipapan ti Mangisalakan (kitaen iti 3 Nephi 11:32, 36; 28:11; Ether 12:41), dumakkel ti kabaelantayo nga agayat iti Apo iti amin a puso, panunot, ken pigsatayo (kitaen iti Marcos 12:30; Lucas 10:27; DkK 59:5).

Dagiti bendision ti inaldaw a pananglaglagip ket sumangbay nga in-inut ken agtultuloy bayat ti panagserbityo Kenkuana, panagbussog iti balikasna, ken panagkararag a sipapammati iti naganna. Ket daytoy a pananglaglagip ti mangubogto kadatayo nga agbalin a napupudno a disipulo ni Apo Jesucristo iti pagarianna ditoy daga—ken iti kamaudianan iti Amana iti nagloriaan a lubong nga umay.

PANANGISURO MANIPUD ITI DAYTOY A MENSAHE

Balakadannatayo ni Presidente Eyring a kanayon a manglaglagip iti Mangisalakan babaen ti panagaramid kadagiti inaldaw a pili tapno ad-adda a mayasidegtayo Kenkuana. Kadua dagiti sursuruanyo, mabalinyo a basan dagiti kararag iti sakramento, a mangbalabala iti katulagan a kanayon a manglaglagip Kenkuana (kitaen iti Moroni 4:3; 5:2; DkK 20:77, 79). Awisenyo dagiti sursuruanyo a mangilista kadagiti banag a maaramid-da iti tunggal aldaw a manglaglagip iti Mangisalakan. Awisenyo pay ida nga agkararag iti Nailangitan nga Ama para iti balligi ken pagimbagan ti tunggal maysa. Ikararagan ida iti kasta met la a wagas.

AGTUTUBO

Pananglaglagip iti Apo iti Inaldaw

Gagayem, trabaho, aramid iti balay, TV—adu pay a banag a mangkiddaw iti imatangtayo. Ngem iti tunggal lawas, ikaritayo iti Nailangitan nga Ama “a kanayon a laglagipentayo ti [Anakna, ni Jesucristo]” (DkK 20:79).

Kuna ni Presidente Eyring a mabalintayo ti “agaramid kadagiti pili iti inaldaw” a makatulong kadatayo a manglaglagip iti Mangisalakan. Agaramid iti panggep a tun-oyen iti daytoy a bulan a manglaglagip nga ad-adda pay iti Mangisalakan iti inaldaw. Mabalinyo ti agaramid iti kalendario ket ikumityo ti maysa a banag iti tunggal aldaw a mangbuangay iti relasyonyo Kenkuana. Ilista ni Presidente Eyring dagiti banag kas iti panagbasa kadagiti nasantuan a kasuratan, panagkararag a sipapammati, ken panagserbi iti Mangisalakan ken iti dadduma. Mainayon pay ti panagsurat iti journal, idadar-ay kadagiti miting iti Simbaan, idedengngeg iti sapasap a komperensia, ipapan iti templo, panagkanta kadagiti himno—ken dadduma pay! No inaldaw a laglagipentayo ti Mangisalakan, ikari ni Presidente Eyring a “dagiti bendision . . . dumtengto nga in-inut ken agtultuloy . . . [ken] mangubogto kadatayo nga agbalin a napupudno a disipulo ni Apo Jesucristo.”

ANNAK

Napno iti Ayat

No agbasatayo kadagiti nasantuan a kasuratan wenno agkararagtayo, mariknatayo no kasano ti kadakkel ti ayat ti Nailangitan nga Ama ken ni Jesus kadatayo. Mangidrowing iti sumagmamano a babassit a sinanpuso iti maysa a dakdakkel a sinanpuso. Ikkan iti maris ti sinanpuso iti tunggal agkararagkayo wenno agbasakayo kadagiti nasantuan a kasuratan. Ania pay ti maaramidyo tapno mariknayo nga asidegkayo iti Nailangitan nga Ama ken ni Jesus?



Pammati Pamilia Tulong

Palikmutan iti Ayat dagiti Kimmayakay

Nainkararagan nga adalenyo daytoy a material ken kalikagumanyo ti inspirasion tapno ammuen no ania ti ibinglayyo. Kasano a ti pannakaawattayo iti panggep ti Relief Society ket mangisagananto kadagiti annak a babbai ti Dios para kadagiti bendision ti agnanayon a biag?

“Kinapudnona awan dagiti perpekto a pamilia . . .,” kinuna ni Presidente Dieter F. Uchtdorf, Maimkadua a Mammagbaga iti Umuna a Panguluen. “Ania man dagiti problema a sangsanguen ti pamilyayo, ania man ti nasken nga aramidenyoy a pangrisut kadagitoy, ti rugi ken gibus ti solusyon ket panangngaasi, ti natarnaw nga ayat ni Cristo.”¹

Kadagiti saan a naan-anay a makiramraman iti ebanghelio, kinuna ni Linda K. Burton, sigud a Sapsap a Presidente ti Relief Society: “Ay-ayaten ti Nailangitan nga Ama ti amin nga annakna. . . . Sadino man ti ayanda—addada man wenno awanda iti dalan—kayatna ida nga agawid iti pagtaengan.”²

“Nupay nayaw-awan [dagiti annakyo], . . . no kasao wenno kasaritayo ida, kasao ida a saan a sipupungtot, saan a makapasakit, iti mangkonkondena nga espiritu,” kinuna ni Presidente Joseph F. Smith (1838–1918). “Kasaritayo ida a siaasi.”³

Ipalagip manen ni Ni Elder Brent H. Nielson ti Pitupulo ti insuro ti Mangisalakana kadagiti addaan iti 10 a piraso apirak ket napukaw ti maysa: “Sapulen agingga a masarakan daytoy. No anakyo ken kabsatyoy ti maysa a napukaw, . . . ti kangrunaan nga aramidentayo, ayatentayoy dayta a tao iti amin a pusotayo. . . .”

“Maawattayo koma ti paltiing a mangammo no kasano ti kasayaatan a wagas nga aramidentayo kadagiti ipatpategtayo iti biag a napukawen ken, no kasapulan, maaddaantayoy iti anus ken ayat ti Amatayoy iti Langit ken ti Anakna, ni Jesucristo, no ayaten, bantayan, ken urayentayoy ti napukaw.”⁴

Kinuna ni Presidente Henry B. Eyring, Umuna a Mammagbaga iti Umuna a Panguluen: “nagkararagak a sipapammati a kalikaguman ken marikna koma ti maysa nga ipatpategko ti bileg ti Pannubbot. Nagkararagak a sipapammati nga umay dagiti anghel a tao a sumaranay kadakuada, ket immayda.

“Nagplano ti Dios kadagiti wagas tapno maisalakan ti tunggal maysa kadagiti annakna.”⁵

Dagiti Mainayon a Nasantuan a Kasuratan ken Impormasion

Mateo 18:12; Alma 31:35; 3 Nephi 13:32; DkK 121:41–42
reliefsociety.lds.org

DAGITI NAGADAWAN

1. Dieter F. Uchtdorf, “In Praise of Those Who Save,” *Liahona*, Mayo 2016, 79, 80.
2. Linda K. Burton, in Sarah Jane Weaver, “Sister Burton, Sister Wixom Visit Church’s Pacific Area,” *Church News*, Abr. 2, 2013, lds.org/church/news.
3. Kitaen iti *Teachings of Presidents of the Church: Joseph F. Smith* (1998), 254.
4. Brent H. Nielson, “Waiting for the Prodigal,” *Liahona*, Mayo 2015, 103.
5. Henry B. Eyring, “To My Grandchildren,” *Liahona*, Nob. 2013, 71.

Ibilang Daytoy

Kasano a maituloytayo nga ipakita ti panangngaasi kadagiti saan nga agtungtungpal kadagiti prinsipio ti ebanghelio?